



Kementerian Kesihatan Malaysia
Aras 12, Blok E7, Parcel E
Pusat Pentadbiran Kerajaan Persekutuan
62590 Putrajaya
Tel: 603-8883 2545
Faks: 603-8889 5542

KENYATAAN AKHBAR KETUA PENGARAH KESIHATAN MALAYSIA

BEKALAN DARAH SEMASA DI SELURUH NEGARA

Kementerian Kesihatan Malaysia ingin menjelaskan bahawa sehingga kini bekalan darah di seluruh negara adalah di tahap mencukupi untuk kegunaan semasa bagi semua kumpulan darah A, B, AB dan O. Kementerian Kesihatan Malaysia berterima kasih kepada orang ramai yang sudi menjadikan pendermaan darah secara sukarela sebagai satu sumbangan kepada pesakit yang memerlukan.

Sebagai makluman, adalah dianggarkan sebanyak 2000 beg darah diperlukan setiap hari bagi kegunaan hampir 1000 orang pesakit di seluruh negara. Sehubungan dengan itu, masyarakat Malaysia adalah digalakkan untuk tampil menderma darah secara berkala yang kerap di samping menjadi penganjur kempen derma darah bagi memastikan bekalan darah seluruh negara berada di paras yang mencukupi setiap masa.

Kementerian Kesihatan Malaysia juga memantau tren pendermaan dan kegunaan darah sepanjang tahun bagi untuk meningkatkan pengurusan bekalan stok darah. Ini bagi membantu Perkhidmatan Transfusi Perubatan menjangkakan masa kemungkinan stok bekalan darah bakal menurun seperti pada musim cuti sekolah yang panjang, musim perayaan dan

semasa bencana seperti banjir. Dengan yang demikian, Perkhidmatan Transfusi Perubatan dapat merencanakan kutipan darah serta melakukan tindakan proaktif seperti promosi pendermaan darah bagi mengatasi masalah kekurangan bekalan tersebut.

Pendermaan darah secara sukarela boleh dilakukan di Pusat Darah Negara, Tabung Darah di hospital-hospital di setiap negeri dan juga melalui Unit Bergerak Kempen Derma Darah. Terdapat 140 hospital di bawah Kementerian Kesihatan Malaysia dan 128 daripadanya berfungsi menjalankan kutipan darah. Pusat Darah Negara beroperasi setiap hari Isnin hingga Jumaat dari jam 7.30 pagi hingga 8.00 malam manakala Sabtu hingga Ahad dari jam 8.00 pagi hingga 4 petang.

Sekian dan terima kasih.

DATUK DR. NOOR HISHAM BIN ABDULLAH

Ketua Pengarah Kesihatan Malaysia

21 Oktober 2015